

Visoki predstavnik se sastao s bugarskim ministrom vanjskih poslova



Visoki predstavnik Valentin Inzko danas se u Sofiji sastao sa bugarskim ministrom vanjskih poslova Kristianom Vigeninom. Na sastanku su razgovarali o političkoj situaciji u Bosni i Hercegovini.

Visoki predstavnik je rekao da očekuje od vlasti koje će biti formirane nakon općih izbora u oktobru da prevaziđu zastoj u procesu reformi i obrate više pažnje na istinske probleme građana izražene tokom protesta početkom ove godine.

Govoreći o predizbornoj kampanji, visoki predstavnik je osudio huškačku i uvredljivu retoriku pojedinih kandidata. Izrazio je nadu da će građani odbaciti takve pokušaje dizanja tenzija i da će, umjesto toga, od kandidata zahtijevati konkretne odgovore na pitanje kako namjeravaju riješiti probleme poput nezaposlenosti, raširene korupcije i sve nižih standarda u obrazovanju.

Visoki predstavnik također je pohvalio Bugarsku zbog njene vrijedne i dugotrajne podrške Bosni i Hercegovini, između ostalog i kroz učešće njenih trupa u EUFOR-u.

Foto: Ministarstvo vanjskih poslova Republike Bugarske